

Юмын пуымо усталык

Канде кава йымалне кажне чонан шканже илыш йӧным муэш. Айдеме гын тӱням уланракым ышташ шочеш. Тиде миссийым шукташ келшыше пашам муэш. Тудын дене кумылангын, ончыко да ончыко ошкылеш, у деч у сенгымашке шуэш. Сылнымут аланыш логалше егат, пӱрымашлан тауштен, шке пашаж дене калыкым куандарымыжым эн куту сенгымашлан шотла. Поэтессе, Россий писатель ушем член, Марий Эл Республикысе культурын заслуженный пашаенже Мардан Раям чапле юбилейже дене саламлышыла лач тиде шонымашым почын пуыде ок лий.



Волжский район Корамас кундемын Чодыраял ялешыже 1946 ий 20 апрельште шочшо Рая Константинова шинчымашым тыршен поген, келшыше специальностьым налын, ешым поген, икшыве-влакым ончен куштен, ласкан пашам ыштен кертеш ыле. Тидлан тудын усталыкше, кид-йол мастарлыкше, шинчымашыже ситеныт. Но ача-коча, ава-кова деч толшо йылме поянлык илышым вес семынак ончалаш, акым пуаш, чон юарлымым сылнымут йӧнла дене почын ончыкташ ўжын. Тиде мастарлыкшым «писатель» лӱм дене палемдыме. А мастарлык ны ийготым, ны могай калык гыч улметым, шинчаончалтышетым, капкылетым ок ончо. Тудо уло але уке. Мардан Раян гын уло. Юмо пуымо мастарлык дене кумылангын ила, пашам ышта, марий лудшо-влакым сылне деч сылне произведенийже-влак дене куандараш вашка. Икымше ойлымашыже «Марий коммуна» газетыште 26 ий ончыч савыкталте да тылеч вара «Ончыко» журнал дене ўмырешлан танлалте. Кажне кугурак ма, изирак саскаже мемнан сылнымут изданийыште шке вержым муо, лудшо-влакын кумылыштым савырыш. Тудын мутшылан возымо ятыр муру ынде марий сценым сӧрастара. А тӱнале тиде усталык «Аваем» чонеш пижше муру гыч.

Пашазе класс радамыште шуаралтше, илышын шерыж ден кочыжым пален налше, вес элыште — США-ште пашам ыштен, илыш ойыртемем тамлен ончышо, эреак тунемаш тыршыше марий ўдырамаш сылнымут ангам чырык курым «куралме» жапыштыже кум книгама лукто. Чапле юбилейже вашеш «Пӱрымаш кыша» сборникше дене марий лудшым куандара.

Палыме да пагалыме писатель — поэт, прозаик, шуко мурылан чонеш логалше мутым возышо автор Мардан Раям чапле юбилейже дене шокшын саламлен, ме тудлан сылнымут пашаштыже у деч у сенгымашыш шуаш, йӧратыме калыкнам сылне деч сылне мурсаска дене куандараш тыланена. Таза, пиалан лий, пагалыме Раиса Ивановна.

«Ончыко» журналын ешыже.